

南州書樓藏書	
徐湯級整理	
類別	字號
E13798	



綠窗庭課

吟卷

冒廣生題



光緒丙申正月
龍山邱園開鋏

綠窗庭課吟卷詩序

吾粵多奇女子而閨秀能詩者代有傳人如國初詩人王蒲衣是嶺南四大家之一其女瑤湘工詩此又家學相承者也余老友順德邱與凡茂才性高潔耽吟詠隱於鄉園日以著述爲事校讐一出其令媛之手兼工詩詞年甫及笄已裒然成集茂才寄其綠窗庭課吟卷屬余點定緣情寫志騁秘抽妍信清才也余旣喜其能承父業益勉其遠紹古之名媛將增輝史乘豈獨王氏云爾哉余方抱疴據几爲讀一過並題數語以弁之時嘉慶二十一年丙子秋粵嶽山人黃培芳序

綠窗庭課吟卷詩序

綠窗庭課吟卷序

吾粵多女史能詩始於晉綠珠與唐之何仙姑其後名媛繼起益盛然攷國朝詩別裁集及粵東詩海所采閨秀一門每多傑作名句惟求其專集皆不可得雖近時女史亦然順德邱仲遲駕部搜得其族祖姑笏月孺人綠窗吟卷一帙孺人爲與凡先生女少習庭課卓擅清才詩數十首閒雅而有遠思絕去纖巧之習詞不多作亦落落灑墨者駕部委余編定梓以行世此不媿女史專集矣余近日訪得吳荷屋中丞女小荷恭人所著寫韻樓稿於葉蘭臺先生齋中已選錄其詞數十首入

綠窗庭課吟卷詩序

二

粵東詞鈔續編惜未梓其詩全稿憶余亡婦佩瓊居士屢欲助余續編嶺南名媛集以病而輟業此卷刻成惜居士不及見矣光緒二十一年乙未十月番禺潘飛聲序于長相思室

詩稱釐爾女士蓋言女子而有賢士之行也其才博其識達其志超超逸不爲流俗所移求之士大夫中往往難之而況得之閨中人耶若陳君劍花妻邱孺人庶不愧乎女士也余與劍花交二十餘年矣稔聞其室中有良友箴規翰墨如琴之得瑟而調珮之應環而響同人莫不豔羨之而內言不出卒亦莫得其詳今冬劍花忽以書來曰吾妻死矣吾憫其生之勤而慮其破之湮也願請銘而列諸幽乃謹按其狀而銘之孺人姓邱氏諱掌珠字矧月爲順德茂才與凡公之女公博學多才旁

緣窗庭課吟卷雜錄

一

及音律孺人性明慧嫻禮則生車六齡卽諳絲竹自是庭訓詩書悉能洞曉大義公著述而校讐多出於其手尤工吟詠所著有緣窗庭課吟卷香山黃香石舍人親爲點定並繫以序年二十歸陳氏逮事舅姑承顏順志繇其家教有方也吾鄉女子俗尙侈靡而孺人于歸後荆釵布裙自安儒素如桓少君之於鮑宣劍花以硯稅糊口孺人亦設帳里中女弟子之出其門者莫不敦姆儀守壺則以故東脩餘潤內助殊多而劍花得無內顧之憂劍花固善畫孺人於摒擋家務外輒從事丹青生香活色點綴天然尤善徐黃花鳥吟牋粉本左右紛披

唱隨中洵稱樂事使天假以年其安貧守儉之風固能
化侈靡習俗鄉閭女範爲之矜式卽士大夫返樸還純
之責孺人且與有力焉而閨房之唱和畫本之流傳其
雅人韻事當更有以廣播無窮也雖然無成有終地道
也婦道也孺人素明古訓故竟先赴黃壚自韜其光專
讓美於劍花以成丈夫異日之器耶嗚呼志亦遠矣孺
人生嘉慶己未年二月十三日卒年四十六歲今以道
光甲辰年十一月初九日葬於此山之原銘曰

錦裁其心雅吐其音璇閨有秀而儼列於儒林才可爲
傳筆步爲趣中饋留型而怡情於爾素嗜吊香草賦蘭

緣窗庭課吟卷雜錄

二

苙銘貞石而心降先浣毫於陸之海潘之江

邱孺人輓詩

李 翺 雲谷

杏花疏雨日黃昏灑淚東風憶細君從此枕邊惟有淚

虛疑神女解為雲 集古句

盧 斌 蔚巖

一讀新詩一愴然孤燈隻影倩誰憐此生我亦傷情者

夢斷香銷廿一年 子三十二作鼓盆人於茲廿一年矣今讀悼亡詩能無同病相憐之感

何其芳 芸史

休誇蔡謝擅才名絳帳當年粉黛盈今日嫦娥邀女傅

廣寒應有讀書聲

綠窗庭課吟卷雜錄

梁 齡 覺生

鏡花水月影中人粉本吟牋翰墨新四十六年如一夢

青鶯池館為誰春

周錫培 蘇谿

乃翁樽酒舊交知都講書堂款步遲今日嫁奩賸殘卷

可憐人誦菊花詩 菊花百詠孺人父與凡先生所輯

畫格簪花畫逼真天然風韻自驚人總緣夫婿耽深隱

輸與今生李阿因

丈人峯倒久堪悲嬌女秋風并詠詞若問邱為三畝宅

一般憔悴柳絲絲

周作孚 程門

愁天不老老情天紫玉歸來已化烟香斷蘅蕪空有夢
好因緣是短因緣

青鳥歸來信未回名花落地委蒼苔而今春事猶餘恨
豆蔻稍頭不作胎

陳式倫 夢鑑

蛛網冰絃別韻沈謝家羅幃月痕深而今不譜流泉曲
怕見青衣又捧琴 嫂素嫻音律所蓄琴予常借譜流泉
之曲每過吾兄嫂必令侍兒出琴俾
之子鼓

姚芳 杏村

綠窗庭課吟卷雜錄

四

一曲離絃感暮秋鸞飄鳳泊易生愁夜闌空對妝臺月
不見文君詠白頭

許炳章

落葉哀蟬曲英雄尙有情況聞錦瑟詠吟自玉溪生碧
海虛前約青山訂後盟秋商無限怨併入可憐聲

陳嘉頤 小程

花間蘭畹辨詞章直接騷壇一瓣香如此綺才工度曲
夜臺休唱憶秦郎

畫樓接近翠微顛粉本空留翰墨緣想到月明風靜後
歸魂應泛米家船

番禺潘飛聲蘭史編訂

香山黃培芳香石選定

順德邱誥桐仲暹輯校

順德邱掌珠匆月著

四言

興雲歌

早望雲霓翹首天東觸石而起四野濛濛如風從虎虎
起遠空如石成羊羊奮霄中霏霏高山驟變喬松化作

綠窗庭課吟卷

膏雨慰我三農

五古

家大人命錄嶺南詩特將閨秀諸作別成一帙諷
詠之餘賦此書後

天南煜離明文士得其半餘彩及蘭閨粉黛爭炳煥今
錄嶺南詩名媛輝藻翰時得誦清芬珠璣足珍玩自愧
學殖荒駘雅失淹貫庭訓義有疑徘徊幾問難閨闈寡
交遊行不出里閉心羨卷中人尚有空長歎

勉弟家駒

吉人當從善惟慮日不足策力須髫齡盟心慎幽獨午

夜一燈青詎必爲千祿細究千秋心忍倦一雙目自晨
帶經鋤至昏隨月讀我聞古人言公卿出白屋

勸弟慎交

千秋車笠盟豔見古人說奈何肝膽交竟作市井結利
在則交親利澹則交輟豈知傾蓋人道義共歡悅贈紵
與分金慎勿媿前哲

暮春卽目

春色曉烟裏春光柳花中王孫怨芳草帝子啼春風屬
目迴風亭花竹何菁葱暖影魚上沼留春鳥鳴空如何
生微颺徑徑飛殘紅

綠窗庭課吟卷

秋夜靜讀不覺夜半

繡闥坐寒更歷歷涼風透不憚連夜勞乃得爲文富名
志異男兒尙願功成就月色下臺階溶溶花影瘦祇覺
裕衣單不知報殘漏

懷友

春暮唱陽關於今又秋至涼飈入小樓颯颯吹衣袂流
水無知音屋梁增別思不見報平安終夜心如醉空庭
白露稀耿耿不成寐

七古

讀嶺南名媛集

美人珠璣浣腸胃咳唾含春有情致腹笥長舒卷軸光
摘毫自具烟霞氣仙姑吐屬何清新瓊臺我愛邱夫人
鴛鴦繡處金針度下筆翰君能有神

倦繡命侍兒煮茗以消春晝

日影度闌干十二停針倦繡迴文字可是春風啜茗時
起點梵甌聊破睡捲幕烟鶯燕子飛憑闌風送桃花至
小鬟閒立聽瓶笙好借清風滌腸胃

春日晚香圃卽事

小園春滿疑烟霧淺綠深紅春暗度燕始呢喃歸晝梁
鶯猶睨睨調新簧霏霏濃靄溼流光平林蒼翠沾羅裳

綠窗庭課吟卷

三

波漾池西草自芳風來院午花皆香忽看雨過園林後
碧眼窺人牆外柳

琴臺懷古

荒臺遺蹟仍依舊古琴無復高山奏臺有芳名負古今
琴無清徽傳宇宙喬松古柏殊森森只傷流水無知音
伯牙已逝鍾期死千古誰人識此心

落葉誌感

秋林葉葉如鴉飛霜紅一抹渲翠微直與落霞爭斜暉
寒砧催落何悽悲觀此飄零長歛歔且爲黃花醉一卮
人生七古來稀

冬夜度經閣候曉

天雞一聲出海嶠欲曙未曙頻瞻眺疏林寒度隔溪鐘
窗色糊模將欲曉銅鉦仍未懸扶桑梅花釀雪分清光
篝燈力與寒威戰縮瑟布幃愁夜長轉瞬殘星失歷歷
擁出紅輪海雲赤

縮春園賞春

東風一夜吹香來喜見鶯花拉春回畫闌倚遍意徘徊
屈指韶光驚半度疏雨杏花愁薄暮芳草斜陽空古渡
我來欲作惜春詞花落花開無幾時綠陰好聽黃鶯兒

清流月夜圖

代家君題畫送邑侯李鐵橋大令凡二十四首之一

綠窗庭課吟卷

四

雲歛晴空月華靄金波灩灩輝滄海一珠拋落蛟龍宮
頑鱷饒鯨盡震駭滔滔江水涵青天冰壺濯魄彌澄鮮
人語君侯淡於此胸如月鏡心如水

五律

月色

愛此幽亭月晶瑩遠近同玉篩花影碎金漾水紋融清
惹詩人興寒生繡閣中眠遲頻徙倚不爲怯西風

江行

行盡沙溪路江聲落晚潮新晴山靄合返照水光搖帆
泊村前渡人歸野外橋忽聞漁笛響灘畔已停橈

梨雲小榭與諸姊賞梨花

邀月梨雲榭梨花澹可人飄來簾外雪清入甕頭春妝
靚花無色筵開月滿身溶溶迷院落虛白照西鄰

避暑江樓作

晚倚危闌立無邊菡萏香樓陰徒蕩漾海氣自荒茫風
軟帆檣過潮生枕簟涼西山炎日落餘爽透衣裳

江樓晚眺

江樓開薄暮山郭散餘霞野樹烟中暗風帆村外斜田
猶飛白鷺月未上蒼葭隱見漁舟泊停橈傍淺沙

贈別諸姊

綠窗庭課吟卷

五

欲倩橋西柳飛花代送行臨歧增別恨流水帶離聲酒
冷腸猶熱風迴棹轉輕攀條重握手不盡故人情

初聞蟋蟀

促織聲初起涼風滿小樓近人知在宇應候聚鳴秋入
夜吟偏切寒閨聽轉幽青燈花自落此景最生愁

七律

春草

一度韶光一度榮鳩鳴啼處逐愁生痕迹蠟屐兼山路
色入湘簾又雨晴旣與綠波縈別恨還隨青塚得芳名
年來檢點人間事獨笑東風有世情

春蠶

食葉聲如下筆時西陵風俗後人師蟬雖能蛻難留繭
蛛不容纖枉結絲錦繡織成堪共賞胸懷吐盡果誰知
馬娘舊恨休重論報賽千秋尙有祠

春郊

絲雨廉纖喜暫停小樓間倚望郊坳風纔解凍扶隄柳
水自分明向蓼汀幾見牛羊歸滿野一叢嵐靄欲將暝
何當鴉集陽斜處便面山光滿郭青

春社

村鼓冬冬處處催正逢戊己賽寒灰曾聞宰肉操刀割

綠窗庭課吟卷

六

應見治龔送酒來鍼綫已停鄰女繡鷄豚交勸野人杯
笑聲相逐扮榆晚絡繹羣歸日漸隕

睡燕

新巢結後得幽棲倦宿雕梁怯露迷戢翼不沾寒食雨
離魂應帶落花泥有情疑蝶迨迨夢多事嬌鶯恰恰啼
愁煞數聲乍驚覺烏衣巷口夕陽西

壁蟹

水鄉風味昔人知剖出團臍罄酒卮稻熟橙香同入饌
清霜明月已傳詩葛仙曾著無腸說吏部嘗云左手持
漫道松江鱸膾美傾樽那似含黃時

蛛網

三面齊張巧變更
簷牙傍晚正縱橫
殘機到處循環織
亂緒憑空結撰成
小院經營防乍雨
幽牕補茸趁新晴
自來就食無他業
祇仗漁佃過此生

蒲劍

九節春深始發硎
鑄從溪澗勝青萍
鋒磨蟹爪泥痕淺
斲出魚腸水氣腥
時與風胡同淬石
夜無雷煥爲觀星
清光最愛涵秋水
結綠猶存百鍊形

霜鐘

青女行霜夜已闌
遠鐘清徹叩林端
風微花外聲將盡

綠窗庭課吟卷

七

月落烏啼氣漸寒
敲碎白雲知寺遠
凋餘黃葉惜秋殘
江風漁火高吟客
愁卧應憐布被單

早梅

小雪嚴霜不住催
一枝曾占百花魁
春光度嶺偏先覺
山意衝寒欲漸開
疏影夜隨明月轉
微香時逐好風來
何人待索巡簷笑
竹外橫斜幾費猜

五絕

鳳城八景

鳳嶺朝暉

東海騰初旭
晨光破宿昏
扶桑千嶂赤
鳳嶺五雲屯

錦巖夜月

素魄耀巖前午夜光如雪龕間黯佛燈崖畔烏啼月

丹井留香

仙迹遺丹井清泉滌道心飲來能換骨何止值千金

雲路松陰

一塔破天青千松夾道峙如龍欲渡江隱隱濤喧耳

太平春雨

春色遍南洲春光滿烟渚太平山畔快此一犁雨

竹灘雪濤

一望雪汪洋寒濤噴晚涼飲殘鮓膾酒灘外月如霜

綠窗庭課吟卷

八

福海烟波

福岸氣鴻蒙人在烟波裏客子泛星槎訝有潛龍起

鼇峯夕照

殘照映峯頭翻江同石壁遠岫牧人歸一聲牛背笛

漁父詞

一葉泛江湖不畏風濤急前村酒可沽何必到城邑

縮春園

紅杏不出牆小鳥啼清晝園林咫尺間一段春如繡

春暮

春照花尤豔春殘花尙香送春詞未作柳絮撲斜陽

水簾

飛瀑來何處經年不斷流誰家綴珠箔長挂白雲頭

春徑

春夜百花中落紅深一徑小立問春光啼鳥聲聲應

流水

碧澗自澌澌水流無盡時如何同箭急不及日遲遲

秋日

獨立東籬下涼颺掠鬢邊一聲寒雁過紅葉滿階前

樓頭月

愛此樓頭月高懸一鏡明柳邊停短笛萬籟寂無聲

綠窗庭課吟卷

九

石洞訪故址

雲來洞口迷雲去洞口闢丹竈與茶鐺留得仙人蹟

早春

幽巖猶雪迹新柳已條風初見鶯兒出花間啄嫩紅

蓮塘

采蓮入蓮塘舟小如一葉蓮葉阻行舟不若尋花蝶

溪居

持竿釣溪頭人在溪邊往溪上有閒鷗忘機自來去

七絕

泛湖

楊柳江皋十里秋畫船簫鼓鏡中遊隋堤往事繁華夢
不及停燒自在流

春寒

綠樹陰濃逕未乾醉花天氣雨漫漫鶯慵蝶困泥沾絮
深掩重門不忍看

春曉

晨鐘敲罷夢醒時繡閣呵寒正畫眉忽聽賣花深巷過
捲簾頻喚小肩兒

題歸舟載石圖

宦海茫茫一棹歸壓裝空有萬民詩山陰無限璠璵產

綠窗庭課吟卷

十

留刻南中德政碑

小雨

料峭風斜小雨霏如絲如膏點春衣寺鐘遠出平林晚
尚有行人戴笠歸

七夕

家家乞巧競穿鍼碧落橋成夜已深我愛空階風露冷
燒殘樺燭尙微吟

綠窗庭課詩餘

順德邱掌珠芻月著

憶江南

晴望

風雨歇笠屐傍溪行草岸泥融留馬迹柳橋絮密閉鶯聲一抹斷虹明

長相思

秋月

山光浮水光浮夜半冰輪上翠樓青天雲未收松逕幽竹逕幽烏鵲南飛風報秋銀河隔女牛

點絳脣

冬日

綠窗庭課詩餘

門巷蕭疏風吹殘葉幽林亂圍爐據案添顆金猊炭

日出冰消一帶梅花岸凝寒散香來牕畔偷捲湘簾看

西江月

春暮

芍藥殿春尤白醪醖經雨偏紅一聲社鼓響萋萋燕子來睇畫棟三月韶光媚景將完廿四番風偷悶人過小橋東驚醒池塘鴛鴦

浪淘沙

初夏

日似小年長半畝池塘新荷青貼水中央沽酒晚經村落去蕘繭風香花氣襲羅裳雨過書堂憑闌徒倚納微涼忽聽小蟬深柳咽又是斜陽

雙調望江南

避暑

深院裏三徑綠陰垂碧玉瓜分消渴候紫茸茶熟夢醒
時花氣入窗眉 欵筍簾水閣納涼遲折得碧筒通象
鼻爨來青竈煎龍皮清氣沁詩脾

雙調南鄉子

落花

微雨溼花田飛絮沾泥樹罩烟春起早尋香逕去濺濺
滿地殘紅劇可憐 惆悵曉風前計得韶華賸幾天轉
瞬流光渾似箭翻翻蝶怨蜂愁又一年

蝶戀花

蟬

咽露聲聲來柳底庭院荒涼報道秋風起無限深情吟
綠窗庭課詩餘

二

不止綠槐高處斜陽裏 一曲瑤琴將變徽倩汝清商
遍把闌干倚黃葉林中偏聒耳聞人夢破愁聽爾

風中柳

鷓鴣

錦翼香斑春暮深棲林木望晴川青峯六六巖山曉啄
湘江夜宿叫東風聲聲相逐 黃陵廟裏芳草迷叢竹
行人斷送天涯目雨昏層麓花落飛空谷喚一聲幽人
耳熟

芭蕉雨

畫角

吹落五更殘月戍樓中夜聽尤清徹喚起玉關情切阿
誰發此哀音愁懷百結 梅花飛下如雪最令人心折

遙望長城高秋悽絕無端譜出邊聲頓使客夢難成終宵嗚咽

天淨沙 不寐

更深還賸殘燈又聞四壁蛩鳴留得疏簾月影幽窗人靜送來溪澗聲清

蕃女怨 鞦韆

玉人春戲笙歌院輕如飛燕躲金釵搖寶鈿飄飄香遠羅衣低拂綠楊烟畫闌前

望江東 懷人

涼月下獨倚小樓前流水斷橋千里目白雲芳樹五更

綠窗庭課詩餘

三

天遙望對溪烟生遠思尺素倩誰傳江鯉秋鴻音隔絕寒燈夜漏恨纏綿飛夢到江船

意難忘 漁舟

放浪紅塵駕扁舟一葉棹撥晴灣時來紅蓼港朝出白蘋灘村日落野雲閒罷釣百花潭古渡頭蘼葭風輒挂片歸帆忘機常似鷗間打網漁磯外潮響潺潺綠簑披雪浪青笠戴烟嵐依楚岸泊湘山沽酒入林間趁春風長歌鼓柁帶月方還

綠窗庭課吟卷後跋

族曾祖與凡文學公抱道著書數十種皆刊刻行世見
邑志列傳公女芻月孺人少承庭訓於學無所不窺所
著綠窗庭課吟卷皆少時之作然經黃香石舍人點定
顧未付梓誥桐懼其湮沒乃訪得於同里劉氏家惟篇
帙零雜因細爲校輯而請潘蘭史先生重編刻以附於
家乘孺人適同里陳劍花上舍平生行述實詳黃韓城
孝廉所撰墓志銘上舍復有悼亡草一卷爲孺人作者
他日當刻附於此集之後焉光緒二十二年丙申正月
順德邱誥桐跋於邱園

綠窗庭課吟卷後跋

第100号



100